



KEMENTERIAN WILAYAH PERSEKUTUAN
Blok 2, Menara Seri Wilayah, Presint 2, 62100 Putrajaya
Tel: 03-8889 7888 Faks: 03-8889 7957
Laman web: www.kwp.gov.my

SIARAN MEDIA

UNTUK LIPUTAN MEDIA MASSA

RUN FOR WILAYAH MEMBAWA PESERTA MENIKMATI KEINDAHAN PEMANDANGAN KUALA LUMPUR

KUALA LUMPUR, 16 Februari 2020 – YB Tuan Haji Khalid bin Abd. Samad, Menteri Wilayah Persekutuan melepaskan kira-kira 4,000 peserta Run For Wilayah di Dataran Dewan Bandaraya Kuala Lumpur (DBKL) pagi ini. Program ini dianjurkan oleh Persatuan Rekreasi Wilayah Malaysia dengan kerjasama Kementerian Wilayah Persekutuan dan Dewan Bandaraya Kuala Lumpur yang diadakan bersempena Sambutan Hari Wilayah Persekutuan 2020.

Run For Wilayah diadakan bersekali dengan acara KL Car Free Morning di Dataran DBKL dalam memberi galakan kepada warga Wilayah Persekutuan untuk mengekalkan gaya hidup sihat dengan amalan bersenam. Aktiviti sukan yang dianjurkan ini dapat mengeratkan hubungan kekeluargaan sesama peserta sekaligus dapat mengisi masa lapang dengan beriadah di hujung minggu.

Sasaran peserta adalah dari pelbagai lapisan masyarakat dari kanak-kanak sehingga ke warga emas. Lebih menarik lagi, larian kali ini juga turut disertai seramai 20 Orang Kelainan Upaya (OKU). Pihak penganjur juga menyediakan sebuah kategori khas untuk pasangan yang mempunyai dua orang anak untuk mereka berlari bergandingan.

Larian ini melibatkan jarak sejauh 7KM melalui kawasan atau jalan yang menarik di sekitar Kuala Lumpur. Para peserta berpeluang untuk bergambar di tempat tarikan pelancong seperti Menara Berkembar PETRONAS, Bukit Nanas dan Pusat Pelancongan Malaysia (MaTiC).

Larian ini yang merupakan kali pertama penganjurannya menjadi salah satu *signature program* Hari Wilayah Persekutuan pada setiap tahun. Peserta turut diberikan beg guna semula yang boleh dimanfaatkan untuk aktiviti membeli belah serta riadah. Penggunaan beg guna semula ini akan membolehkan pengurangan penggunaan beg plastik sejajar dengan misi Kementerian untuk warga Wilayah Persekutuan.

Disediakan Oleh:
Bahagian Komunikasi Korporat
Kementerian Wilayah Persekutuan
16 Februari 2020